

大方廣佛華嚴經懸談疏鈔會本卷第六

寧七

清涼山大華嚴寺沙門 澄觀 撰述

亦可前一一門皆成十益可以意得

亦可前一一門皆成十益者此第二意却
是正意上但隨宜耳

寧七

因上十義故此教興發心品中有十所因彼
云以佛神力故世尊本願力故等因緣相參

對會因緣可以意得

因上十義故此教興下第三結屬會釋也
此上結屬下會釋經文彼經具云其說法

者同名法慧悉以佛神力故世尊本願力
故爲欲顯示佛法故爲以智光普照故爲
欲開闡實義故爲令證得法性故爲令衆
會歡喜故爲欲開示佛法因故爲得一
切佛平等故爲了法界無有二故說如是

寧七

第二明說經緣者一切經首說時方人等皆
得

寧七

是緣起

第二明說經緣等者疏文分二先引例總
明後今有十緣下開章別釋前中謂六成
就中信聞二種屬於阿難在佛滅後結集
時安不爲經緣餘四成就爲經緣起說必
依時要有方處人通說聽即佛及衆四義
足矣問智論云說時方人令生信故何以
今言爲緣起耶答六中初二唯屬證信後
四義有兩兼阿難引之爲生物信當時無
此教不得興故爲緣起今十緣中具有此

法十因舉二故有等言言因緣相參者神
力是緣餘皆是因故云相參今畧舉二即
有因緣以疏對彼因緣易知故云可以意
得

四

今有十緣一依時二依處三依主四依三昧五依現相六依說者七依聽者八依德本九依請者十依加者

今有十緣下開章別釋中二先列後釋今

初依時下釋疏文分四一大意二開章三

融會四廣如旨歸一句出法源

今初依時夫心冥至道則渾一古今法界無生本亡時分下經偈云如來得菩提實不繫於日

云衆生如是說某日佛成道如來得菩提實不繫於日法界品云菩薩智輪遠離一切分別網超一切障礙山不可以生死中長短染淨劫數顯示等其文非一况無涯之說念劫圓融哉

三

今初分二先拂迹顯實後就德顯圓前中言夫心冥至道則混一古今者此約人顯實法界下約法顯實心與理冥契則無今古之相故肇公云古今通始終同窮本極末浩然大均生公法花疏云古亦今也今

况無涯之說等者第二就德顯圓無涯之說豎約長時故旨歸云常恒之說前後際而無涯念劫圓融者約一念即不可盡一念即無量劫無量劫即一念等故云爾也一念即多劫何定時之長短哉

今以無時之時略顯十重時別

今以無時之時畧顯十重時別者此下第
二開章解釋也就中三初上二句標次初
唯下釋後於前下結

初唯一念二盡七日三遍三際四攝同類劫

五收異類劫六以念攝劫七劫念重收八異
類界時九彼此相入十以本收末謂以非劫
爲劫故

二釋中初唯一念者謂於一剎那頓遍無
盡之處說無邊法二盡七日者謂初成道

一七日中自受法樂第二七日頓說此經
言三遍三際者謂盡前後際各無邊劫常
恒周遍演說此經初無暫息上三易故疏
但列名而已言四攝同類劫下以義稍隱
故並加字旨歸但云四攝同類五收異劫

六念攝劫七復重收八異界時九彼此相
入十以本收末今加一字義則易見故並
不釋唯釋第十耳言攝同類劫者於前無
邊劫各攝同類如長劫唯攝長劫短劫唯
攝短劫等言五收異類劫者謂長劫攝短
劫等言六以念攝劫者於一念中即攝無
邊同異類劫念念皆爾言七劫念重收者
此上念念所攝劫中各以念成彼一一念
亦各攝諸劫是則念念既其不盡劫劫亦
復無窮如因陀羅網重重無盡也言入異

事七

四之一

類界時者上之七重且約一類世界如今
娑婆一類今辨樹形江河形等無邊異類
之刹既同處而有不同時亦同時而各
別分齊盡彼時分常說此經言九彼此相
入者即彼異類界所有時劫亦各別相收

或同異類界時互相攝入若念若劫重重

無盡同前四五六七於彼諸時常說此經

言謂以非劫爲劫者第十難見故以此句

釋之以非劫爲本劫即爲末言非劫者離分限故如花藏世界以非劫爲劫劫即非

劫念等亦爾以時無長短離分限故以染

時分說彼劫故以時無別體依法上立法

既融通時亦隨爾故離世間品云菩薩摩

訶薩知一切劫即是非劫而真實說一切

劫數是爲第六無等住故云非劫爲劫

於前十時恒演此經

於此無量時劫常說花嚴

又此十種隨一圓收

又此十種者此下第三融會也於中三初

此上二句正融會

依此說時則無始終

二依此說時下通妨難此上牒疑情既無

始終何有初成之始九會之終

亦隨見聞說初成等如前法爾中辨

亦隨見聞下會釋也疏指前通又此一部

即是無邊法海以下皆結通無分齊故一

部即是一切說故

若依此時則迥異餘教而餘教時不出於此或說三七六七等隨見聞故

若依此時下三顯勝能於中又三初揀他

顯勝次而餘教下會他顯勝後或說下再通妨難難云彼有三七等殊云何不出於此故今通云皆是此經之時隨見聞故

廣如下四出法之源

廣如旨歸

第二依處者夫智窮真際能所兩亡假說依

真而非國土

第二說經處疏文有四第一總彰大意第

二敘昔順違第三句數圓融第四別明處
異初中有三初拂迹顯實二融通顯圓三

依義建立今初至而非國土即拂迹顯實

謂既亡能所何有能依之佛所依之處普
賢三昧品云普賢身相如虛空依真而住
非國土猶是假說以真無能所無可依故
況刹塵即入染淨參融圓滿教之普周難以

分其處別

況刹塵即入下第二融通顯圓無能所依
尚通實頓二教實教頓教尚離處所況於
圓教耶刹塵即入即下通局交徹二四句
染淨參融即下淨穢無礙二四句圓滿教

下總結難思

字七

然真非事外不壞所依以上無時之時遍此
非處之處

然真非下第三依義建立不壞相故不妨
立時然旨歸約處先已有依此說經後辨

其時疏家欲順六成就之次第故先明時
耳

然有言此經在穢土說居摩竭等故有云處
淨土說在花藏故有云如實義者二種身土
無定異處即於一處見聞異故

然有言下第二敘昔順違於中二先正敘
後上之下決斷前中第一師云既七處九
會人三天四並居娑婆欲界之中明是穢
也第二師云說此經時花藏世界六種震
動又言其地堅固金剛所成娑婆土石諸

山豈得將此爲穢第三師但合上無礙謂
惑娑婆者對花藏而見娑婆惑花藏者對
娑婆而見花藏亦如螺髻所見自在天宮
身子所見丘陵坑坎花藏品云譬如意見導
師種種色差別隨衆生心行見諸刹亦然

享七

七

上之三義後一近宗

後決斷言後一近宗者且知刹該淨穢即
二四句中之一句未窮立妙故云近宗
然說此經處淨穢無礙通局交徹各二四句
然說此經處下第三句數圓融於中有三

一雙標二雙釋三以龕例細初標可知

初淨穢中謂或唯染或唯淨如前二義或俱
花藏內娑婆故或俱泯染淨相盡同一法界
故

初淨穢中下雙釋先釋染淨二四句前一

四句以本刹末刹相望成四句花藏爲本
刹世尊修因所嚴淨故刹種所持世界爲
未刹應衆生有故然末刹則狹本刹則寬
未通淨穢本刹唯淨若寬狹相望自屬通
局今論淨穢故但取末中染刹前二句可
知第三句雙明本末故得稱俱不同前二
說花藏即不言娑婆說娑婆即不論花藏
今要明花藏之內娑婆如一莊嚴城中舉
一小室耳上三皆約事明第四句唯約理
說若理事相望則前三句皆末第四句獨
爲其本故花藏品云花藏世界海法界等
無別莊嚴極清淨安住於虛空等
又或唯染摩竭等覆淨相故或唯淨其地金
剛染相盡故或俱隱顯無礙故或俱非各相
形奪二相盡故

享七

八

又或唯染下第二四句隨取一刹即有四句不論本末染淨今正約娑婆染刹上論四句也即前三約淨穢虧盈後一約相盡理現若約機說者染就劣機見故淨就勝機見故俱約二人同見故刹體自在故俱

非約頓機故亦唯約體故

次明通局交徹二四句者

次明通局二四句等者先標後釋

謂或局此一界故或通該十方故或俱即此即遍故或泯二相盡故

釋中前四句約一重平漫以論後四句約重重相攝以說又前四約以人望處論通局後四唯約說處論通局前中初二句唯約相說一謂此界七處說經二謂十方諸刹齊說三以相隨性故即一能遍如光明

覺品彼云如此處見佛世尊坐蓮花藏師子之座十方一切諸世界中各有百億闍浮提百億如來亦如是坐此明一會即遍一切非是彼處各別有佛四即歸理平等又或局此界攝一切故或通此入一切故或俱即攝即入故或泯形奪相盡故

後四句中初一約廣容門事攝於理無礙故令一界即理能攝一切二約普遍門事如理遍令此一界隨所依理入一切刹三廣容即普遍故正攝之時便能遍入以此

寧七
二門無異體故四泯同平等門法界之中俱不可得故

又以一塵例刹亦有四句可知

又以一塵下三以龐例細也引文如前依正融通中說

若從狹至寬略顯十處

若從狹至寬略顯十處下第四別明處異中文分爲六一標數二初此下別釋三然上下總結四然說十住下釋妨五十餘佛同者下隨難重釋六又上十處下總融十

義

初此間浮七處九會而周法界如昇湏彌品二周百億同類一界亦遍法界如光明覺品三遍異類樹形等刹四遍刹種五遍花藏六遍餘刹海若種若刹七遍前六類刹塵皆有

同異類刹八盡虛空界容一一毛端之處各
有無邊刹海九猶帝網十餘佛同
二中然其十名與旨歸小有不同旨歸云
初此間浮二周百億三盡十方四遍塵道
五通異界六該刹塵七歸花藏八重攝刹

九猶帝網十餘佛同今疏所以不同彼者以歸花藏即前染淨無礙故不立之故旨歸文云事盡理現染相盡故其該刹塵與遍塵道並皆是塵故第七中攝八重攝刹者亦明花藏中塵一一攝餘刹海亦不異於第六別塵故並畧之而加四五六以成十義彼三即此八彼五即此三此亦賢首畧疏之中光明覺品中意參而用之耳言如昇湏彌品者此文爲證七處而周法界之言文云爾時世尊不離一切菩提樹下而上昇湏彌向帝釋殿下云十方世界悉亦如是法慧偈云一切間浮提皆言佛在中我等今見佛住於湏彌頂十方悉亦然如來自在力皆遍法界之文也七處皆爾文中但三賢三天言不起而遍義如下疏

言如光明覺品者此證百億遍法界法界皆有同類一界言同類者同有湧彌大海鐵圓四洲二十八天各有百億故名同也故彼經云如是無數無量無邊無等不可數不可稱不可思不可量不可說盡法界

第七

+

虛空界所有世界南西北方四維上下亦復如是彼一一世界中皆有百億闇浮提乃至百億色究竟天其中所有悉皆明現彼一一闇浮提中悉見如來坐蓮花藏師子之座十佛刹微塵數菩薩所共圍繞揀唯闇浮故云百億揀下異類故云同類一界言三遍異類樹形等刹者上二皆畧釋下八唯列名而已而言等者等取江河迴轉形等經列二十形結有不可說不可說佛刹微塵數異類一一流類皆遍十方虛

第七

十一

寶光明世界種其中攝二十重佛刹微塵數結有不可說佛刹微塵數世界於中布列今遮那亦遍其中言五遍花藏者謂遍花藏一界有前十不可說佛刹微塵數世界種既皆如來修因之所嚴淨故常處其中而演說法言六遍餘刹海若種若刹者即花藏之外十方無間窮盡法界之刹海例如花藏也如第六卷現相品說花藏世界海東有世界海名清淨光蓮花莊嚴南名一切寶月光明莊嚴藏西名可愛樂寶

光明北名毘瑠璃蓮花光圓滿藏東北名
闇浮檀金玻瓈色幢東南名金莊嚴瑠璃
光普照西南名日光遍照西北名寶光照
曜下方名蓮花香妙德藏上方名摩尼寶
照曜莊嚴結云十億佛刹數等是也言

七遍前六類刹塵者前之六段各是一類
此上諸刹皆以塵成一一塵中皆有佛刹
如來於彼塵內刹中說經故花藏品云花
藏世界所有塵一一塵中見法界法界尚
見何況刹耶又云一一塵內難思刹隨衆

生心各別住又云如於此會見佛坐一切
塵中悉如是其文非一言八盡虛空界容
一一毛端之處各有無邊刹海者此不論
成刹之塵但取容塵之處遍於空矣如二
界中間空無有物亦是容塵之處今取遍

法界虛空界有刹無刹有塵無塵但可容
塵之處即有無邊同類異類一切刹等如
來於此常轉法輪阿僧祇品云一毛端處
所有刹其數無量不可說盡虛空量諸毛
端一一處刹悉如是彼毛端處諸國土無

量種類差別住有不可說異類刹有不可
說同類刹不可言說毛端處皆有淨刹不
可說種種莊嚴不可說種種奇妙不可說
如是等文其證非一而言於中說法者彼
次頌云於彼一一毛端處演不可說諸佛

釋七

十一

名出妙音聲不可說轉正法輪不可說於
彼一一法輪中演脩多羅不可說於彼一
修多羅分別法門不可說於彼一一法
門中又說諸法不可說於彼一一諸法中
調伏衆生不可說等言九猶帝網者彼

一微塵既各攝無邊刹海即此刹等後有
微塵彼諸塵內復有刹海是則塵塵不盡
刹刹無窮如帝釋殿網重重重重不可說
其分量而毘盧遮那亦重重重重無盡無
盡常演說法言十餘佛同下文自釋

學七

十三

然上十類一一各遍法界而前九正是遮那

說法之處

然上十類等者第三總結也由上十門初
二有遍法界之言從三至十皆畧此言故
今總結皆遍

然說十住等處雖復各遍法界乃至塵毛爲
門不同亦無雜亂

然說十住下第四釋妨謂有問言若忉利
天說十住法既遍虛空周於毛道未知夜
摩天等亦說十住不設爾何失二俱有過

十住爲門唯言十住遍十行爲門唯明十
行遍等故云爲門不同亦無雜亂

若約十住與十行等全位相攝則彼此互無
各遍法界若約諸位相資則彼此互有同遍

法界

若約十住至彼此互有同遍法界者即第
二重通再難謂更有問言若約爲門不同
爲互相見不若相見者還成雜亂若不相
見何以知遍今答此問明有見不見謂若
約相即則不相見若約相入則許互見言

若約十住與十行等全位相攝則彼此互無各遍法界者是相即門謂若以十住攝於餘位則唯有十住餘位如虛空以餘位廢已同十住故餘位亦爾十住遍時非十行等遍故云各遍法界言若約諸位相資

則彼此互有同遍法界者是相入門以約

力用互資不壞自他如兩鏡相照故東鏡動時鏡中之影亦動故得同遍法界而有主伴故非雜亂如十住爲門帶十行等同遍法界時但名十住遍不名十行等遍若十行等爲門亦然則有力能攝者爲主無力被攝者爲伴前相即門中正十住遍時不妨餘遍但隱顯不同耳十住遍時十行等即隱十行遍時餘隱亦然依相即門亦名爲純遍周法界塵毛唯有十住等故後

是說

一一會品准此知之十餘佛同者此佛既爾餘佛例然故諸會結通皆云我等諸佛亦如辨

十餘佛同者下第五隨難重釋中二先正顯同遍後然主主下釋通妨難前中以豎窮三際橫遍十方佛佛德用說法皆同故故經云三世諸佛已說今說當說疏中引

經我等諸佛亦如是說即橫論也即證法佛言也十地經云我不見有諸佛世界彼諸如來不說此法即金剛藏說法菩薩言也

然主主不相見伴伴不相見主伴伴主則互

相見若互不相見即各遍法界互相見故同
遍法界亦無雜亂亦無障礙

然主主下二通難中謂有問言餘佛說處
與遮那佛爲相見不設爾何失二俱有過
謂若相見即垂相遍若不相見即垂主伴

故爲此通謂見與不見二義俱成二互相
見主伴義成見與不見遍義皆成但各遍
同遍以爲異耳文具四句言主主不相見
者遮那爲主時十方餘佛但得爲伴不得爲
主若餘佛爲主遮那亦即爲伴不得爲

主故云主主不相見二伴不相見者如
諸佛爲遮那伴時遮那更不得爲伴故云
伴伴不相見非謂彼伴佛自不相見言
主伴伴主則互相見者即第三第四句也
三主伴得相見者如遮那爲主見餘伴佛

伴佛亦見遮那故四伴主相見者如遮那
爲伴餘佛爲主則得相見然三四二句義
則不異但約一人互通主伴故成四耳言
無雜亂者結爲門別故言無障礙者約常
融攝故

又上十處共爲緣起舉一全收以一一稱法
性故而隨前一一時皆遍此諸處又隨一一
處皆具前時頓說此經此猶約器世間說若
約智正覺及衆生世間即一一佛身肢節毛
孔皆攝無盡重重之刹普賢衆生一一皆爾

並是遮那說經之處

又上十處下第六總融十義於中分三初
正顯十義融通次而隨下對時顯處後此
猶約下通顯甚深謂上十重但是器世間
耳未說佛毛及衆生毛孔中事一一皆悉

重重無盡言普賢衆生一一皆爾者普賢若望如來亦名衆生世間若望衆生亦名智正覺世間又舉普賢則攝一切菩薩也

寧七

十六

大方廣佛華嚴經懺談疏卷會本卷第六